


**TEZAU LITURGIC**  
**14 NOIEMBRIE**

**SLUJBA**  
**SF. CUVIOS**  
**FILIP**  
**DE LA IRAPSK**



**MOSCOVA, 2000**



# Месяца ноября в 14-й день Преподобнаго отца нашего Филиппа Ирапскаго, чудотворца

## На великой вечерне

На Господи, возвах: стихиры, глас 5:

Радуйся, жителю пустынный! Ревнитель учителю своему был еси, преподобному отцу Корнилию, стопам последовал еси его, духи лукавыя от человек отгнал еси, и ныне сподобился еси во свете зрети Пресвятую Троицу, Юже моли спастися душам нашим.

Гласу же бывшу, тебе, отче, и свету велию ясно являему, и путь тебе показующаго, идеже Господь повеле моления и молитвы приносить, и труды ко трудом прилагати. Моли, преподобне, Бога Милостиваго, еже спастися душам нашим.

От вышняго явления и видения света присносущнаго, озаряющей зари, гласу ти слышавшу, отче, сущу глаголавшее во свете незаходимом. Моли, отче Филиппе, Бога Вышняго, да просветит во тьме сидяция и подаст нам велия и богатя милости.

Яко крин в пустыни давидски процвете, и яко шипок благовонен явится миру, в месте

безмолвия, духовныя радости сподобися, отче наш Филиппе, видети во свете святую Троицу, Юже моли, воздевши руце преподобнии, глаголаше: Всесвятая Троице, спаси и соблюди во смирении рабы своя.

Глас 2:

Вышняго Иерусалима, отче, был еси гражданин, и от Господа своего дар прият. На земли явися пустынный житель, яко ангел земный и человек небесный. Молением своим, наставил еси многия люди к благоразумию и спасл еси, отче, души их, великий молебник Святыя Троицы быв.

Слава, глас 5:

По преставлении твоём, отче, стекошася людие, слышавше святое твое отшествие ко Господу, от мира многомятежнаго, молящеся тебе и сице глаголюще: радуйся великий молебниче и предстателю Святыя Троицы, молися о нас яко отец чадолюбный, просяще у Господа милости, еже спасти души наша.

И ныне, Богородичен, глас той же:  
Богородица, Ты еси Лоза истинная, возрадившая нам Плод живота, Тебе молимся, Владычице, со святыми апостолы, помилувати души наша.

Вход, прокимен дне, и чтения.

Премудрости Соломони чтение:

Праведных души в руце Божией, и не прикоснется их мука. Непщевани быша во очесех безумных умрети, и вменися озлобление исход их. И еже от нас шествие сокрушение, они же суть в мире. Ибо пред лицом человеческим, аще и муку примут, упование их безсмертия исполнено. И в мале наказании бывше, великими благодетельствовани будут: яко Бог искуси я, и обрете их достойны Себе. Яко злато в горниле искуси их: и яко всеплодие жертвенное прият я. И во время посещения их возсияют, и яко искры по стеблию потекут. Судят языком и обладают людьми, и воцарится Господь в них во веки. Надеющийся Нань разумеют истину, и вернии в любви пребудут Ему. Яко благодать и милость в преподобных Его, и посещение во избранных Его.

Премудрости Соломони чтение:

Праведницы во веки живут, и в Господе мзда их, попечение их у Вышняго. Сего ради примут царствие благолепия, и венец доброты от руки Господни: зане десницею покрывает я, и мышцею защитит их. Примет всеоружие рвение Свое, и вооружит тварь в месть врагом. Облечется

вброня правды, и возложит шлем, суд  
нелицемерен. Приимет щит непобедимый,  
преподобие: поострит же напрасный гнев  
оружие: споборет же с Ним мир на безумных.  
Пойдут праволучныя стрелы молниины, и яко от  
благокругла лука облаков, на намерение полетят.  
И от каменометных ярости, исполнь падут  
грады. Вознегодует на них вода морская, реки  
же потопят я нагло. Сопротив станет им дух  
силы, и яко вихор развеет их: и опустошит всю  
землю беззаконие, и злодейство превратит  
престолы сильных. Слышите убо, царие, и  
разумейте, навикните, судии концев земли.  
Внушите держащии множества, и гордящися о  
народех язык. Яко дана есть от Господа держава  
вам, и сила от Вышняго.

### Премудрости Соломони чтение:

Праведник, аще постигнет скончаться, в покои  
будет. Старость бо честна, не многолетна, ниже  
в числе лет исчитается. Седина же есть мудрость  
человеком, и возраст старости - житие  
нескверное. Благоугоден Богу быв, возлюблен  
бысть, и живой посреде грешник преставлен  
бысть. Восхищен бысть, да не злоба изменит  
разума его, или лесь прельстит душу его.  
Рачение бо злобы помрачает добрая, и парение  
похоти пременяет ум незлобив. Скончався

вмале, исполни лета долга, угодна бо бе Господу душа его, сего ради потщася от среды лукавствия. Людие же видевшие и не разумевшие, ниже положше в помышлении таковое, яко благодать и милость в преподобных Его и посещение во избранных Его.

На литии стихиры, глас 2.

Подобен: Егда от древа:

Моли, отче всеблаженне Филиппе, Всеблагаго Бога, да милости Своя Божественная изольет неоскудно на вся предстоящая люди и чтущия святую память твою.

Моли, преподобне отче Филиппе, Всесвятаго Бога, да милостию Своею избавит отечество твое от супротивных нашествия и междоусобных брани не предаст нас, празднующих любовь твою святую память твою.

Моли, отче достопамятне Филиппе, Всевышнего Бога подати милость братии, подвижающейся на месте пришельствия твоего и на вся христиане, да невозбранно взойдем от земли на Небо.

Слава, глас 8:

Приими, Всеблагий Господи, молящегося за ны наставника и покровителя нашего, преподобного Филиппа. Той вся земная сладости небрег, любовь еже к Тебе и людям разжизаем, достиг обителей Небесных. И нас сподоби, Боже,

любовь оную стяжати, да купно вси достигнем селений райских.

И ныне, глас той же:

Приидите, людие, восхвалим вси Святую Деву, Бога плотию рождшую, нас от ада и смерти свободившую; Тоя бо руце Свой молебне к Сыну Своему простирает, просяще нам мира и велия милости.

На стиховне стихиры, глас 5:

Желанием Духа Святаго восприяв и востече на высоту богоразумия, ища покоя душе своей, идеже бы единому уединенно пребывати, моляся Святей Троице за вся люди, сохранить от грехов и ненаветованным им быти и благая получитьи.

Стих: Честна пред Господем смерть преподобных Его.

Оболчашеся любовию Христовою и купец пребогат был еси, купуя себе многоценный бисер Христа Господа своего, Егоже возлюби. По Господе ревнитель был еси, якоже вторый Илия, той взят на колесницу огненную, ты же, отче Филиппе, восприял себе пустыню уединения и безмолвия, Господеви молися, отче наш, спаситися душам нашим.

Стих: Блажен муж бояйся Господа, в заповедях Его восхощет зело.

Днесь, людие Божии, приидем, приспе бо нам

великое торжество, блаженного отца нашего, Филиппа, жителя пустынного, чудотворца и учителя, молитвенника за ны ко Господу теплейшего и помощника скорого в бедах и скорбех и лютых обстояниях. Моли, отче, еже спасение улучшить нам.

Слава, глас 8:

Крепкого и твердаго адаманта, прогонителя духов лукавых во исчезновение, почтим. Сей бо восприят крест на рамо свое, и поиде во след Господа, прогоняя духи лукавыя и бесовская их ополчения, человекам показуя путь ко спасению. Моли, преподобне Филиппе, спасти души наша от невидимых врагов и обстояний.

И ныне, глас той же:

Безвестная Дево, яже Бога неизреченно заченши плотию, Мати Бога Вышняго, Твоих рабов мольбы прими, Всенепорочная, всем подаючи очищение прегрешений, ныне наша моления приемлющи, моли спастися всем нам.

Тропарь, глас 4:

Яко кедр, в пустыни давидски растуц, и яко финикс, благоуханен цветущ, ревнитель учителю твоему был еси, преподобному отцу Корнилию, стопам бо его последовал еси и, святое иго взем, светлым житием просиял еси, яко солнце, явлься мирови многими чудесы, отче Филиппе! И ныне

на Небесех предстоиши Престолу Пресвятыя Троицы и, яко великое имея дерзновение, преподобнии свои руке воздев, моли от враг сохранитися градом нашим и спастися душам нашим.

### **На утрени**

По первом стихословии седален, глас 4:  
Любый всякого человека и милый, Филиппе преподобне, сохрани и настави стадо твое, Царствие Божие взыскующее, восполни скудость, любовь нелицемерную подаждь, отец чадолюбивый буди нам и благ.

Слава, и ныне, Богородичен:  
Ты еси Мати чистая Пресвятаго Бога, Владычице всяческих, Богородице Марие, со всеми святыми моли Милосердаго Господа за люди православныя.

По втором стихословии седален, глас 4:  
Преподобен и честен, сосуд духовный мира многоценнаго полон, возделан еси Богом и исполнен сугубыя благодати, и дар восприят от Господа своего и крест взем, оружие на враги, прогоняя их и всю силу вражю, и многия люди уверил еси, отче, и привел еси от маловерия в веру, и спасения путь открыл еси им,

поклонятыся единому Богу в Троице славимому,  
моли Христа Бога спастися душам нашим.

Слава, и ныне, Богородичен:

Тебе, Мати чистая, свет отцев, Бога плотию  
рождшую, вопием: умоли, Владычице, Содетеля  
всей твари, за вся люди, молящияся Тебе.

По полиелеи седален, глас 4:

Погребл еси страстей вся востания  
умерщвлением плоти, священный отче, и жизнь  
бесконечную приял еси. Нас же днесь  
празднующих твою святую память, Царствия  
Господня наследники яви.

По 50-м псалме стихира, глас 4:

Заступника твердаго и великаго обретши  
помощника, еже испросити у Господа милости,  
положившаго душу свою и помышление, тесным  
шествовавшаго путем, преподобнаго Филиппа  
ныне вси почтим, моляще: испроси у Бога, отче,  
великия и богатя милости Его на богобоящияся  
люди твоя.

Канон преподобнаго, глас 8

Песнь 1

Ирмос: Песнь возсдем, людие, чудному Богу  
нашему, свободившему Израиля от работы,  
песнь победную поюще и вопиюще: поим Тебе,

Единому Владыце.

Приидите, людие, радостно внидем в церковь Божию и увидим раку блаженного отца нашего Филиппа, и воскликнем умильно, глаголюще: радуйся, великий наш о Господе учителю и молитвенниче.

Твердаго тя и крепкаго обретше помощника, еже испросити у Господа великия милости.

Радуйся, угодниче Божий Филиппе, за души наша пред Богом молитвенниче.

Сокровище многосокровенное в дому Бога нашего, ныне же видим источника чудес, многая чудеса больным изливающего и просящаго оставления грехов.

Богородичен: Кто возможет многое Твое заступление, Владычице, изреци, молишия бо ко Христу Богу нашему за множество согрешений наших. Заступи нас, Госпоже, скорая помощнице миру всему.

### Песнь 3

Ирмос: Утверждаей рукою Твоею, Слове Божий, небеса просвещением Твоего истиннаго познания, утверди и нас, на Тя надеющихся, сердца.

Видите, людие, многоцелебную раку святаго, яко от источника многотекущаго подает исцеления преподобный Филипп, и молится, предстоя

Святей Троице, о душах наших.

Дом Святаго Духа, отче, ты был еси, и Владыце нашему много моляся, люди ко Истине обратил еси и свет Божественный показал еси. Испроси улучшить вечный покой со святыми.

Предстателя и молитвенника тя великаго имамы ко Господу, предстоя у престола Святыя Троицы, за архиереи и священники, вкупе за вся православныя люди. Стране нашей от нахождения варварскаго, пленения и междоусобныя брани, великий молебник буди, отче Филиппе.

Богородичен: Милости источниче, чудес множество, Богородице Мати чистая, заступи ны от нахождения злых агарян и от пленения их избави рабы Твоя.

Седален, глас 4:

Велика тя обретши помощника и молитвенника от всяких бед и искушений вражиих, предстоиши бо Владыке и Господу своему, моляся за вся, мы же, грешнии, предстоящее ти у святыя раки твоея, молящися с верою, еже спастися душам нашим.

Богородичен, глас той же:

Мати Пречистая Богородице, Егоже без искуса мужеска заченши родила еси, Сына Твоего и

нашего Владыку и Господа моли за вся  
предстоящия рабы Твоя.

#### Песнь 4

Ирмос: Услышах, Господи, слух Твой и убояхся,  
яко неизреченным Советом, Бог сый  
Присносущный, от Девы прошел еси, воплощся.  
Слава низхождению Твоему, Христе, слава силе  
Твоей.

Помраченную душу мою страстьми многими,  
богоразумия светом просвети, Святая Троице,  
предстателя и молитвенника за вся ны имея  
отца нашего Филиппа.

Устрашился еси, блаженне, видения и удивился  
умом, видев блистание Божественного Духа на  
месте покоища своего, велию светлу зарю, Богом  
показану тебе, отче Филиппе. Испроси у Господа  
милости на богобоящихся чады твоя.

Место, на нем же ты, отче, вселися, свято есть.  
Зде житии и возва ты глас Божий. Моли,  
блаженне Филиппе, за подвизающуюся тамо  
братию и за вся христианы о еже спастися нам.  
Богородичен: Гору Тя велию, юже виде Моисей  
огнеопальну и не жегому, Иаков же Тя лествицу  
на Небо восходиму зря; молим Тя, Мати Божия,  
умоли Содетеля всея твари спасти души наша.

## Песнь 5

Ирмос: Утренюет дух мой к Тебе, Боже, от Отца рожденному неизреченно и воздвигнувшему рог спасения нам.

Духовными очами предочистився, отче, боговидно, и пророческого дара сподобився, видел еси славу Господа, Его же моли, Филиппе богоблаженне, за вся люди, чтущия память твою.

Столп огнен явился, наставляя тя, блаженне, еже по Бозе восприятие благаго разума, просвещая создание все, еже получи от Господа велия милости молитвами твоими, угодниче Божий Филиппе.

Блаженных отец славу восприях, ныне прохлаждаешия в обителех Небесных, но твоя ради любви, отче, наш Филиппе, не забуди нас, обремененных, прогоняя лукавыя духи и болезни врачую милостию Божественною.

Богородичен: Великое Твое заступление подаеши молитвами Своими и храниши вся православныя люди, Владычице, всего мира упование и предстательство.

## Песнь 6

Ирмос: Содержима мя приими, Человеколюбче, грехи многими, и припадающа щедротам Твоим, яко пророка, Господи, и спаси мя.

Предочистимся, братие, и с верою внидем во святое и пустынное место вселения святого, и просвещающися поклонимся вси со страхом вопиюще: радуйся, преподобне отче Филиппе, моли за ны Святую Троицу.

Явление тебе, отче, бысть, зари пресветлой, ясно сияющей, и божественный глас тебе глаголющий показывает место, идеже тебе молитвы ко Господу приносить, духи лукавыя от человек отгоняти и в разум маловерующия привести.

Краснаго и тихаго селения достигл еси, отче, в пустыню уединения вселися, не дал еси сна очима своим, славу и богатство ни во что же вменяя, попечение имея токмо о душе своей еже спастися и в познание Истины приити.

Богородичен: Любвию Ти приношу, Дево, похвальную песнь: радуйся Мати, Всенепорочная Владычице, спасения нашего вина.

#### Кондак, глас 8:

Воспоем ныне предивнаго в чудесех, возсиявшаго во области Бела озера, просиявшаго, яко солнце. О, неистощимый источниче чудес, святче Божий Филиппе, всегда Святей Троице предстоя и молением предваряя за страну нашу и о всем мире, не забуди и нас, твоих раб, призывающих тя молебным пением,

честную память твою творящих, помолися о нас ко Господу во святых своих молитвах, да спасет души наша.

### Икос

Учителю твоему, отче, преподобному Корнилию подражая, вселился еси в место пустынное. Испытания претерпевая от бесов и князя немилосерднаго, в посте и собеседовании с Богом пребывая, очистил душу твою, отче Филиппе. Жизнь твоя яко зеркало явился всем подвижающимся во обители твоей и мире всем, отче. Моли, блаженне, Пресвятую Троицу, подати празднующим святую память твою страх и ревность божественную.

### Песнь 7

Ирмос: Халдейская печь огнем распалая, орошашеся Духом, Божиим предстоянием, отроцы пояху: благословен еси, Боже отец наших.

Приидите, отцы и братие, с верою свещи своя возжем и помолимся Троице Святей: Владыко Отче, молитвенника Тебе приносим отца нашего Филиппа, егоже молитвами спаси души наша. Преподобне отче наш Филиппе, виждь люди твоя и избави нас от нашествия иноплемennых, злых и лукавых человек, да воспоем: избавителю Боже, благословен еси.

Мира многомятежнаго отшел еси, отче, един изволил пребывати в безмолвии на месте покойне и виде свет Святыя Троицы, Ей же поюще: Боже, благословен еси.

Богородичен: Оружие, Дево Чистая, Тебе ради явился. Божественный огонь в Деве Святей опаляет многое злобство злых человек, встающих на святое место сие.

### Песнь 8

Ирмос: Муסיкийским органом согласующим, и людем безчисленным поклоняющимся образу в Деире, три отроцы не повинувшеса, Господа воспеваху, и славословляху во вся веки.

Возделан еси Богом и дом Духа Святаго, отче, был еси, и Владыце своему моляся за вся люди, сердце укрепи и отверзи устне Пети Всесвятую Троицу: Господа пойте, дела, и превозносите Его во веки. (Дважды)

Обогащашеся, святче, божественным дарованием, мы же величие твое не возмогая зрети, глаголем: Господа пойте, дела, и превозносите Его во веки.

Богородичен: Под кров Твой, Чистая, прибегаем; от всяких вражиих искушений, бед же и скорбей, и вечнаго огня избавляемся, еже показа неизглаголанно, Дево, поющим: Господа пойте, дела, и превозносите Его во веки.

## Песнь 9

Ирмос: Тя, Небесе и земли Ходатаицу, вси роди ублажаем, плотски бо вселися в Тя исполнение, Дево, Божества.

Свыше Силы Небесныя, Херувими и Серафими со страхом воспевают трисвятую песнь Отцу и Сыну и Святому Духу: Свят еси во святых Своих, творяй чудеса рабом Своим.

Блажат тя и хвалят вси, отче Филиппе, великаго светильника и угодника Святыя Троицы, молебника за вся предстоящия люди, просяще исцеления от различных недугов душевных вкупе и телесных.

Распяляющесе благодатию Твоею, Господи, любовьию приносим песнь; страсти попали огнем божественным восстающих и хотящих разорити дом Святыя Троицы и селение святаго отца нашего Филиппа, иноков благослови и нас, поющих Тя, ущедри.

Богородичен: Терние страстей наших попали огнем невестственным и тления и огня вечнаго избави, Дево, и сподоби нас стати одесную Сына Твоего и Бога нашего.

### Светилен, глас 8:

Веселитесь, людие, видевши светильника великаго и молебника теплаго за вся христианы, преподобнаго отца нашего Филиппа; предстоя у

престола Вседержителя, молится да избавимся всяких бед же и скорбей и злых обстояний.

Слава, и ныне, глас той же:

Тя песньми немолчными ублажим, Святая Дево, яко Единого от Троицы родила еси и носивши на руку Твоею Пребогатое Слово, Его же моли, вкупе с преподобным Филиппом, еже спастися нам.

На хвалитех стихиры, глас 5:

Воспоем ныне, светло радуящеся, людие, и ликующе: радуйся, великий о Господе наш учителю, отче Филиппе, молися за ны ко Святей Троице, предстателю и молитвенниче о душах наших.

Предстатель великий и молебник теплый, твердый заступник от бед различных и скорбей, во искушениях помощник скорый, во обстояниях забрало; Филиппа вси почтим великаго: радуйся, отче, Белоезера святыня и России всея похвало.

Имамы тя великаго заступника, людей православных множество, от различных стран на твое святое торжество сошедшеся и верно молящихся: великий молебник Святыя Троицы, отче Филиппе, не примолчи за ны ко Господу, празднующих достославную память твою.

Слава, глас 6:

Веселятся Небеса и радуется земля, видевши  
успение твое; сошедшуся народу множеству,  
светло ликующе и благодарственно хвалу  
воздающе тебе, отче: радуйся, жителю  
пустынный, Филиппе блаженне, молися за ныко  
Господу, во еже спастися душам нашим.

И ныне, глас 8:

Богородицу Марию вси воспоим: радуйся, Мати  
Божия. Радуйся, Лествице одушевленная и  
разумная. Радуйся, Купино неопалимая.  
Радуйся, Стамно всесвятая. Радуйся, Цвете  
веры. Радуйся, Жезле прозябший. Радуйся,  
златая кадильнице. Радуйся, Горо Божия  
приосененная, Дево. Радуйся, разрешение  
первья Евы. Радуйся, Престоле Божий. Радуйся,  
многомилостивая Красото. Радуйся, Владычице.

